



LAM EPA

LOMIGA
ME - IUNI 2021

EKALESIA FAAPOTOPOTOGA KERISIANO AMERIKA SAMOA

VALAAUINA LE SUSUGA I LE FAIFEAU FAIAOGA O FALETOI AOFIA MA LE FALETUA E FAI MA FAIFEAU TAUSI NUU I LE EFKAS I AOA

ANOTUSI

Valaauina Rev. Faletoi Aofia ma le faletua EFKAS Aoa	1
Mai le Failautusi	2
Lauga	3
Faaso Faaleagaga Tuisa: Rev Faletoi	4
Itulau mo Tupulaga	7
Fa'auuga a Aoga i totonu o le Laumua i Kanana Fou	8
Susuga i Faifeau ma A'oa'o agavaa mo le galuega Tausi Aulotu	9

A ua tali mai o ia ia te ia, Ou te le alu; ae ou te alu i lo'u lava nuu ma lo'u aiga. Ona fai atu ai lea o ia, ou te aoi atu lava, aua e te tuua i matou, auā ua e iloa matou te to lauapi ai i le vao, e fai foi oe mo matou mata. (Numera 10 f.30,31)



Faataoto 9 f.10

“ O le mata'u i le Alii, o le amataga o le potolea; ia iloa foi le Paia, o le atamai lava lea.”

I le aso 28 masina o Aperila i le itula e 10 i le taeao, na osia ai le feagaiga a le Susuga i le Faifeau Faiaoga ia Faletoi ma le faletua ia Faioso Aofia ma le Ekalesia i Aoa. O le sauniga i le osia ai o le feagaiga sa ta'ita'iina lava e le Susuga i le Faifeau Toeaina o le Pulega Vaifanua o Sekuini Sevaaetasi FT, o le Faitau ina o le Tusi Paia sa fofogaina e le Faifeau ia Pesamino Tuitea FS, o le tatalo sa feagai ma le Susuga i le Faifeau o Siaso Fale FS, o le lauga autu o le aso na saunoa iai le Susuga i le Failautusi o lea lava Pulega le Faifeau ia Afalupetoa Uta'i FS.

O le Afioaga i le Tiakono Toeaina o lea lava Pulega Mamea Salā, sa fai ma fofoga o le aulotu e tusa ai ma le latou filifiliga. Sa ia saunoa ai, ina ua faamavae ma le Tama Toeaina ia Fiti ma le faletua ia Alofa Aofia ona o le Penisione a le Ekalesia Aoa, sa latou usitaia lava faavae a le Ekalesia aoa, ma faatalanoaina ai lava le mataupu mo so latou tofi. Ae ona o nisi o fuafuaga faalemalō, na faatuai teisi ai. Sa ia saunoa foi i le tala o le latou palota, e toatolu lava faifeau na aafia i le filifiliga, ma sa matauina le manumalo silisili o palota a le Susuga i le Faifeau Faiaoga o Faletoi Aofia. Sa saunoa foi le tiakono toeaina, o le faamoemoe lava o le latou filifiliga, sa tuuina pea i le Atua e ala i talosaga, e faasino mai e ala i le palota, lea e faafetai ai i le Atua i lana pule faasoasoa mai, lea ua osia ai le latou feagai ma nai o latou matua faaleagaga. Na saunoa foi le Susuga i le Faifeau o Faletoi

Aofia e tusa ai ma lo laua valaauina mai le Atua, lea ua toe tofia ai i laua e fai ma faifeau i le Ekalesia i Aoa, ina ua mae'a tausaga e tolusefulu ma le fa o tausaga o galulue ai tua'a o le Susuga i le Faifeau, le Tama Toeaina Malolo o Fiti ma le Tina ia Alofa Aofia. E fa'aleo ai lava lo laua agaga faafetai i le Atua, ona o le filifilia ai o lo laua tagata faatauva'a mo lana feau ma lana galuega. Na faamae'aina le osia ai o le feagaiga i le tatalo na saunia e le ta'ita'i, a o lo'o fa'ae'e ai i luga o la'ua ulu, a'ao o Tama Toeaina o le Matagaluega i Sisifo, auā le galuega fou ua faatautoina ai i laua.

Sa saunoa le to'oto'o lauga i le upu faamalosi maua mai le Tusi a Numera 10 f.30,31: “A ua tali mai o ia ia te ia, ou te le alu; ae ou te alu i lo'u lava nuu ma lo'u aiga. Ona fai atu ai lea o ia, Ou te aoi atu lava, aua e te tuua i matou, auā ua e iloa mea matou te to lauapi ai i le vao, e fai foi oe mo matou mata.” O le tala i le fesagaina a Mose ma Opapo. O le tagata ua tauau ina musu ma le galuega, ae na faamalosi pea mo le galuega. Lea na faamamafaina ai e le to'oto'o lauga, O le a le taua o lou iai i le valaauina e fai ma faifeau i nuu ma afioaga, e le gata o faifeau, ae so'o se valaauina lava i so'o se matatā. Ioe e taua le faataua o soo se valaauina e faaogaina ma tofofi ai tatou e le Atua, aua o nisi ia o meaalofa taua, ua ia filifilia ai tatou. Tatou faamaoni, tauivi ma faamalolosi pea, ma ia aua nei galo le agaga o le loto faafetai i le Atua e le aunoa, ona o lona faaogaina pea o i tatou o tagata

Fa'aaauu itulau 4



Ta'ita'i-Fono: Fa'aeteete Saifoloi FT
Sui Ta'itai-Fono: Dr. Leatulagi Fa'alevao FT
Failautusi Aoao: Nafatali Falealii FS
Teutupe: Poialii Fiasili P. E. Haleck TK



Ekalesia Fa'apopotoga Kerisiano Amerika Samoa
 Pusa Meli 1537 – 1 Kanana Fou Street Pago Pago,
 Amerika Samoa 96799 Tel. (684) 699-9810
 Fax: (684) 699-1898
 imeli: cccas@efkasonline.org
 upega-tafailagi: <https://efkasonline.org>

Ofisa a le Failautusi Aoao, EFKAS

Aperila 8, 2021

Nofo i Matagaluega EFKAS Mamalu i Komiti Tumau Mamalu i Mafutaga Lagolago Ekalesia Aoao EFKAS

MATAUPU: Fono Tele XXXIII – Iulai 11-25, 2021 – faia i luga o le Upega Tafailagi

Susuga e,

I le suafa manumalo o le Alii Toetu, e ofo alofa ma fa'atalofa atu ai i le mamalu o le Ekalesia Aoao EFKAS; mai lava i ona mauga tetele, seia o'o i mauga iti! Malo le soifua, malo le lagi e mamā i le alofa o le Atua. I lenei foi vaitau o le Eseta ua tatou aulia, e momoli atu ai alofaaga a le Susuga i le Ta'ita'ifono ia Fa'aeteete Saifoloi FT ma le Laulauafono o le Fono Tele. Malo le galulue! Fa'afetai le ofoina atu mo le Atua ma Lana galuega.

Ua faia lenei tusi, i le ava tele ma le fa'aaloalo, e fa'asilasila atu ai: **o le a fa'ataunuaina le Fono Tele XXXIII a le EFKAS ia Iulai 11-25, 2021.** Talu ai o loo tapunia pea alavaa mo le malaga mai i Amerika Samoa ona o le fa'ama'i, ua manatu ai le Laulauafono, **e faia le Fono Tele XXXIII i luga o le upega tafailagi.** O nisi ia o fa'atonuga mo le fa'ataunuaina o lea fa'amoemoe:

A. Usufono Fono Tele XXXIII:

1. O usufono uma mai fafo, e aofia ai usufono o Matagaluega ma Komiti Tumau/Mafutaga

Lagolago, o le a potopoto i se nofoaga e mafai ona fesootai fa'atasi mai ai i luga o le upega tafailagi (i.e. falesa, hall, etc).

2. E taoto atu i Laulau o Matagaluega i fafo, pe talafeagai le potopoto fa'a-Matagaluega, pe potopoto fa'a-Pulega. Ia fuafua i le aofa'i o usufono, le nofoaga o le a fa'aaogaina, aemaise o masini o le a fesootai mai ai, pe gafatia. E tatau foi ona tausisia tulafono o le nonofo valavala (*social distancing*) ona o le fa'ama'i. Na o le taimi e usuia ai le fonotele (Iulai 18-25), e mana'omia ai ona potopoto ma fesootai fa'atasi mai ai.

3. O usufono uma i Amerika Samoa, o le a potopoto i le malumalu 'Ua Taunuu', e fesootai fa'atasi ai ma le 'au usufono mai fafo i luga o le upega tafailagi, i le taimi e usuia ai le fonotele.

E. Komiti Tumau/Mafutaga Lagolago:

1. Talu ai e le o lava le malosi o le upega tafailagi i Kanana Fou e fesootai uma ai Komiti Tumau/Mafutaga Lagolago i le taimi e tasi mo a latou fonotaga i le vaiaso o Iulai 11-17, o le a fa'atulaga le fonotaga a isi Komiti Tumau/Mafutaga Lagolago i luma mai; poo le fa'aiuga o Iuni, poo le amataga o Iulai.

2. Na o le Komiti a le 'Au Toeaina ma le Mafutaga Aoao a Tina, e fono i le vaiaso o Iulai 11-17. A o isi Komiti Tumau/Mafutaga Lagolago, o le a toe fa'ailoa atu i se taimi o muamua le aso e fono ai, pe a mae'a ona tu'u fa'atasia le porokalama mo le fonotele.

3. Mo sui o Komiti Tumau/Mafutaga Lagolago mai Matagaluega i fafo, afai e lei oo mai lou tuatusi imeli (email address) i le Ofisa Tutotonu, e manaomia ona e resitala i luga o le website a le Ekalesia e fa'aoo mai ai: <https://efkasonline.org>, e sauni ai mo fonotaga i luga o le upega tafailagi.

4. O sui o Komiti Tumau/Mafutaga Lagolago i Amerika Samoa, o le a potopoto i le Ofisa Tutotonu poo le malumalu 'Ua Taunuu,' e fesootai ai i luga o le upega tafailagi mo fonotaga. A o sui mai fafo, fesootai mai lava le tagata ia i se nofoaga e lelei ma talafeagai.

Ua mafanafana lona loto ma ua foliga ai ua militino faatasi ma le tagata o loo la tauivi pea. Lea lava ua augani le tagata, sei tuu mai o Ia sei alu, ae faauta, “Ou te le tuuina atu oe e te alu sei e faamanuia mai”. Vaai i le ola finau ma le tauivi o le alii nei, lea ua manino mai o le Atua lava lea ua la fesagai. E leai se tasi e vaai i le Atua ma ola pea, o le talitonuga lea o Isaraelu, ae a lenei sailiga ma lenei tauiviga? Ua le gata i lea, ae ua fesili foi i le igoa o lana paga na la tauivi i le po atoa ma ua foliga mai ai, ua leai sona fefe, ae ua saili ma le mautinoa, ma le faatuatua atoatoa, ma lona talitonuga e to se tali mo ia. Ua ia mautinoa lelei o le Atua lava lea. Faafofoga foi, “E le toe Iakopo oe, ao Isaraelu”. Le Atua alofa, le Atua malosi, le Atua o le loto faamagalo, lea ua ia faamanuia ia Iakopo. Mulimuli ane pe a faaauuina le tala, ua faaalua lea alofa ina ua fusifusi ma feofofoa'i ma lona uso o Esau. Le faamoemoega taua lea na momoo ai lona loto na ala ai ona tauivi pea ina ia maua so la leleiga ma lona uso.

E faapena le sailiga ma le tauiviga a le tamaititi faamaumauoa. I lona malosi na faamoemoe i ai aemaise le vaega o le tamaoiaiga ua vavaeina mo Ia. E ui lava o le tala faa-faatusa (Faataoto) ae o loo momoli mai ai le malo o le Atua, ae o loo aumai ai le ata o le Atua e faatonutonu folauina le ola saili ma le finafinau o le tagata ina ia sagatonu o ia, ma ia taunuu i se faamoemoega lelei. Faimai le molimau a Luka, “Ona atamai ai lea o ia” O le mea moni ua ia aoaoina le Atua alofa ma le Atua faamagalo mai i le manogi le lelei o le nofoaga e tausi ai puua ma ua ia toe finauina le ala mo se faamoemoega lelei mo ia. Lea lava na talia lelei e lona Tama. Ioe le tauiviga ma le sailiga a lo tatou Alii Faaola. E le gata i le paka i Ketesemane, lea na toetoe a lafoai ai lona loto usitai, ae na ia alaga lava, “Aua le faia lo'u loto, ao lou finagalo”. Le tauiviga na ta'umanualoina ai le satauro ma ua toilalo ai le tuugamau, ona o lona faamoemoe mo oe ma au ma le lalolagi atoa i le OLA FAAVAVAU. Faafetai le tauiviga a le fanau faauu o lenei tausaga, faafetai foi i matua i le tatou foi tauiviga ma le finauga ina ia manuia fanau, aemaise le Matagaluega o Aoga. Tauiviga foi aua lo tatou saogalemu mai i le Covid 19, faafetai i le malo ma Ekalesia.

Ia manuia ona o Iesu, AMENE.

Rev. Faletoi EFKAS Aoa

Fa'aaau mai itulau 1

faatauvaa. O le Susuga i le Faifeau o Faletoi Aofia ma le faletua, na valaauina o avefa ma faiaoga i le Kolisi Faafaifeau i Kanana Fou. Sa fa'au'u i laua i le Kolisi Faafaifeau i Kanana Fou i le tausaga 2014, ona fa'auuina ai lea o le ola a'oa'oina i le a'oga Tusi Paia i Berkley i Amerika, ma faamanuina ai i le faailoga o le Master, ma toe talii mai ai i fanua ma galulue ai.

Na faapea foi ona faaloalo le Susuga i le Faafaigaiga o Faletoi ma le faletua o Faioso Aofia ma le mamalu o le Ekalesia i Aoa, i fa'aaloaloga a o se faifua foi, auā le Susū atu o Tamā Toeiina o le Matagaluega ma le Lauaufono o le

Ekalesia Aoa, ao le mamalu i Faifeau ma le aofia ua potopoto. Sa maeu le laufofoga fiafia o le Ekalesia i Aoa, o fiafiaga lava o le feiloaiga ma lo latou tofi.

Na maea le faamoemoe i le Agaga o le loto faafetai ina ua mautu atu le Susuga i le Faafaigaiga ma le faletua i le nu'u ua filifilia e galulue ai, ma faamaeaina i le tatalo, ona lulu-lima lea ma faatofa i lea aso taua. **Soifua**

MAFAUFAUGA FAALEAGAGA

PEPA MO LE MAFUTAGA O LE AUFAGALUEGA (RETREAT) EFKAS 2021

MANATU FAAPITOA:

“E LUTIA I PUAVA AE MAPU LAVA I FAGALELE”
(*Distress at Puava, but rest at Fagalele*)

Tusi Faitau: (Autu) Mataio 13: 24-30, 36-43

E muamua lava ona faafetaia le Atua, auā sa o tatou vao ese'ese a'o lenei ua fuifui faatasi i le manuia e ala i lenei mafutaga. Ou te faatalofa atu i le mamalu o lenei tauoafiaga, Susuga i Faifeau Toeiina aemaise Susuga i Feagaiga-aulagi, Susuga i Faifeau ma le atoa o le 'Au Faigaluega. Viia le alofa o le Atua ma Lana tausiga ua tatou feiloai ai i pu'e o manū 'ae lē o mala. Auā o lea ua tuta i matafaga lelei ma tatou tapisa i Lona alofa tunoa, e pei ona iai le faamanuina o le faaolataga na Ia tapenaina mo le lalolagi. Ia nona pea i le Atua Mamalu le viiga uma lava nei ma aso uma e lē aunoa.

O le manatu autu o lenei pepa e faapea: “E lutia i puava ae mapu lava i fagalele”

Fai mai le upu, e tuaoi afā ma maninoa. E ui foi ina tata lautaliga le matagi, e toe maua le malū ma to fale o tautai. O le mea lea e momoo i ai tautai, o le malū, auā e le fagotaina le sami i le souā. E leai foi le tasi e fia ola pea i se olaga mafatia ma le vevesi, tatou te naunau uma i se olaga to'afimale ma le filemu.

O le uiga tonu lava lea o upu ua faa-autu ai se lagona vaivai, fai mai o Puava o se ogasami e alo gatā, peitai e lē tumau pea lea faigata, auā e maua le mapu pe a taunuu atu i le malū o Fagalele. O lona uiga, po'o a lava luitau e fesaga'i ma le tagata soifua, ia tumau pea le faamoemoe mo aso lelei i le lumana'i. O le ola mautinoa lea ia faavae ai le soifua o so'o se Kerisiano. A matagi taumuaina lona sa i pe'au fafati ma peau lagavale, 'aua ne'i lata mai le silasila, a ia talitonu ma le faatuatua atoatoa, e iai le fa'amoemoe. *There is Hope!!!*

O le fesili, e faapefea ona tatou taunuu atu i lona faamoemoe (*hope*)? O a ni laasaga ma ni matati'a faatino e ausia ai lea tulaga?

O le Faataoto i le SAITO ma le TITANIA

(*Matthew 13:24-30/ Gospel of Thomas 57*)

Tasi lenei o faataoto iloga a Iesu o lo'o molimau ai le Evagelia o Mataio. Ua faatulagaina e Mataio o nei faataoto i le mataupu e 13, o lauga a Iesu e tauala atu i faataoto (*Sermon in Parables*). A'o lauga o lo'o taoto tonu lava i le fatu (*center*) o le tusi.

O lenei la faataoto i le saito ma le titania, o lo'o manino mai ai le militino faatasi o le lelei ma le leaga. E le'o iai fo'i se naunautai i lea faataoto ina ia faatalise ma vave ona tavavae eseina nei si'ulagi e lua. Ae o loo faatagaina le

isi tala e faatusa ai le malo o le lagi, e pei ona iai le tala i lulu saito.

1 **Double Indirect Narrative Parables.** These are parables that tells a story. Something happens in the story that creates a problem or possibility. The remainder of the story brings resolution. The term double indirect comes the fact that these parables use other people and other subjects to speak to the listeners. Examples of this type would include the Prodigal Son (Luke 15:11-32) and the Parable of the Banquet/Wedding Feast (Luke 14:15-24).

2 (**Gospel of Thomas 57**) *Jesus said: The kingdom of the Father is like a man who had [good] seed. His enemy came by night and sowed weeds among the good seed. The man did not allow them to pull up the weeds. He said to them: Lest you go and pull up the weeds, (and) pull up the wheat with it. For on the day of the harvest the weeds will be manifested; they will be pulled up and burned. (Abbreviated: GTh 57)*

3 Matthew's ending seems to have been expanded to fit his allegorical interpretations.

4 Perkins, PHEME. *Hearing the Parables of Jesus*, (Paulist Press: New York, 1981), 83. "Verses 37-39 describes the separation of the "sons of the kingdom" from the "sons of the evil one," a dualistic expression typical of Jewish apocalyptic judgment scenes."

5 Verses 41-21 introduce a theme which is typically Matthean: Christians must remember that the Church (the field) is subject or being put forward to judgment.

6 Greek word: *echthros*: meaning hated, odious, hateful, opposing another.

O lo'o molimau foi se tasi o tusi e le'i mafai ona fa'a-Kanona i lenei lava faataoto, o le Evagelia o Tomasi². I le *GTh 57*, o lo'o aumaia ai lenei faataoto i se faamatalaga pupu'u. A faitau ai ma le manino, e le'o ta'ua se fetufaiga i le va o le matai ma ana auauna, e pei ona aumaia e Mataio. Ui lava i lea, o lo'o lagolagoina lava e le *GTh* lea manatu, e **le'i faatagaina e le matai ona vele'eseina le titania.**

Mo Mataio, o lo'o manino mai ai le faamatalaga faaiu mo lenei faataoto.³ E iai le faaopopoga ua faia e Mataio. A fua i lona anotusi (*content*) o le faaopopoga na afua ina ua omai le 'au so'o ia Iesu ma talosaga atu ina ia faamatala mai ia te'i latou le uiga o le faataoto i le titania i le fanua.

Ona faamatalaina lea e Mataio lenei faataoto ma faatusaina i le faamasinoga ("*judgment*" vv.36-43). I fuaiupu e 37-39, o lo'o faamatalaina ai le vavae-eseina o tagata o le malo (*children of the kingdom*) mai le fanua a lē ua leaga (*children of the evil one*), o se faaliga itulua (*dualistic expression*) e masani ai tusitusiga fa'a-Apokalifa a tagata Iutaia e uiga i le faamasinoga.⁴

E le fesiligia le faaaogina o nei ata, auā pe afai o Mataio le tusitala o le Kerisiano Iutaia fo'i. O lona uiga e iai lona malamalama i nei ituaiga mataupu. I le fuaiupu 41-42 o loo folasia mai ai se tasi o manulauti o le tusi o Mataio: Ia manatua e Kerisiano uma e faamasinoina foi le lalolagi atoa/ po'o le fanua (field) e pei ona ta'ua.⁵

O le mea ia maunitoa, o lenei faataoto e le'o taoto tele sona faamamafa ma ni a'oa'oga i le itu fa'afai-faatoaga (*agriculture*). Peita'i, o lo'o pulato'a lenei faataoto, i gaioga poo uiga e lē masani ai le tagata soifua (*unusual actions*). O nei "*unusual actions*" e lē tatau ona atagia i so'o se Kerisiano Faatuatua. A'o uiga ia o lo'o faia e lē ua ita mai, po'o

e taula'i la latou va'ai i le **onosa'i (patience)** o le matai. Se'i toe taga'i tasi lava i le fetufaiga i le va o le matai ma ana auauna.

I. E lua ituaiga lulu (*sowing*) na faatino:

Tagata: saito lelei

Fili: titania.

II. Ripoti mai Auauna:

Fesili: Le Alii e, e le o le saito lelei na e luluina i lou fanua? O lenei pe naifea nei titania?

Tali: Ua fai lenei mea e se tagata ua ita mai.

III. Talosaga mai Auauna

Fesili: Ete finagalo ea matou te o atu e vele'eseina ia mea?

Tali: Aua, tuu pea i e selesele latou tevavae'eseina.

E tulaga ese le finagalo o le matai e pei ona faailoa i ana auauna, "**tuu ia, ia tupu lua pea.**" O se vaaiga e uiga ese. O lea ua silafia e le matai, ua avea o ia ma tagata manu'a (*victim*) i le osofaiga a le fili, e pei ona faia i lona fanua. O le upu moni, afai o se faatoaga o loo i totonu o se nuu ma se afioaga, ae tupu ai se tulaga faapea, e lē umi lava se taimi e saili ai le fili ae maua. Peita'i, e tulaga ese le tali atu a le matai. Muamua, ua ia lē finagalo e **taui ma sui**, i le ma lea, ua ia **vavao atu le faamamaina o le fanua** seia o'o i le seleselega. Ua manino ai iinei le atamai tele o lenei tagata. A fua atu i lana faaiuga, ona tatou vaaia lea o se **faatofalaiga lelei**. Fai mai lona taofi, "ina nei liaina le saito pe a vele'esea le titania, o lea e sili ai ona faatalitali (*wait*) mo le aso o le seleselega." E tusa ai ma saililiga, e faigata tele ona iloa le ese'esega o le saito ma le titania a'o laiti.⁷ E le gata i lea, e foliga mai ua fai se tele o le fai numera o le titania sa luluina. A o'o loa ina fili faatasi o a'a o le saito ma le titania, ona atili ai lea ona faigata ona faia ai se fuafuaga fa'avavevave.⁸

⁷ Most grant that tares and wheats are almost indistinguishable at the early stage, which is understandable if only a millimeter or two difference in the size of the blades of the leaves exist.

⁸ Snodgrass, Klyne R, *Stories with Intent: A Comprehensive Guide to the Parables of Jesus.* (Eerdmans Publishing Company: Michigan, 2008), 203. 4

E iai foi le aoga o le faaola pea o le titania, a o'o i le aso o le seleselega, o le 'a aoga le susuina o le titania e fesoasoani i le toe faamamaina ma le toe poliliina o le ele'ele mo le lumana'i. Atonu o se vaaiga faatiga-mata (eye sore) i le tilotilo atu i se fanua ae vaoa ma lē faamamaina, peita'i, e iai taimi e tatau ai ona fai faapea, e pei ona iai le faautautaga mamao a le matai ua mafua ai, ona tuu pea e tupulua. E iai nisi o molimau e faapea, o le auala foi lea sa faia e o tatou tagata e talia'i le o'o mai o le fama'i o le lega ma faaleagaina ai ma'umaga. Fai mai a toto le talo, ona tuu ai lea e faavaoa. E le toe velea, ae tuu ai pea e tupulua faatasi ma le vao, pau lea o le auala e malu ai mai le faama'i o le lega ma faasaoina ai. E le gata i lea, ae o le a vave foi ona ti'eti'e le i'o o le talo, auā ua maluia i la'au ma le vao.

Tua'ele'ele o le Tusi o Mataio:

E faigata tele ona tulituli se feso'otaiga o lenei faataoto ma le lotiofale (*community*) o Mataio. Atonu e vave ona faatusaina e nisi i le va o Iutaia (*Judaism*) ma le 'au Kerisiano. A fua fo'i i le tala Mataio o i le mataupu (15:12-14) o lo'o tautala ai i le 'au faresaio, o e o loo faifai mai i le talalelei, ua faatusaina e le Alii, "o le la'au o le a liaina". E mafai foi ona vave se faatatau ma faatusaina

i totonu lava o le anofale o Mataio i tagata lotu, i a latou amio (*mixed character*) ma uiga e faaalai i totonu o le mafutaga. Peita'i, e tulaga ese lava leni faataoto. Ioe, e moni e iai fete'enaiga o amio (*mixed character*) i totonu o le lotoifale o Mataio, ae e le o se manatu tupito lea.

Ua faailoa mai e leni faataoto i le lotoifale (*community*) o Mataio, e ui ina afio mai Iesu ma aumai le malo o le Atua i le lalolagi, e iai le leaga.⁹ O le uiga fo'i lea o le "tuu ai pea e tupulua". A'o leisi lea vaega taua i le taumafaiga a Mataio, auā o loo tuu fesili pea nisi, afai ua afio mai Iesu ma tala'ina le talalelei o lona malo, aisea o lo'o iai pea le leaga i le lalolagi?

⁹ It is factual that the righteous and sinners coexist in the world even when the kingdom is present.

¹⁰ Matthew 11:3

Sa maualuga lava lo latou faamoemoe i se Mesia o le a afio mai ma vavae'eseina le saito mai le titania, ma aumaia se lotoifale mama (*pure community*) mo i latou. Sa o latou talitonu lava o le afio mai o le Mesia, o le a faatoilalo ai le malo o Roma ma o latou fili. O lea foi le tulaga o lo'o manino i upu a Ioane le papatiso, sa ia manatu lava i se Mesia e sau ma le faamasinoga (*judgment*), ae ina ua vaai atu i le ata o le oti, lea sa ia toe auina atu ai ona so'o ia Iesu ma le fesili, "O oe ea le maliu mai, pe matou te faatali i se tasi?"¹⁰ O mafaufauga nei, sa taula'i ai lagona o tagata e uiga i le o'o mai o le Mesia. O le a sau le Mesia, e faasala i e agasala, faatoilalo Roma, faamasino atu i le faresaio ma le au tusi-upu. O vaaiga masani nei, i mea o le a faia e le Mesia. Ae talofa, e leai ma se mea e tasi na tupu. Ua tuu fesili ai loa ma faapea ifo, o fea leni malo o loo tala'ina e Iesu. E faapefea ona fai mai ua iinei le Mesia ma lona malo, a'o lea e iai pea le leaga? Lua, ia manino ma iloa e ui ina le'i taunuu le faamasinoga, ae ia mautinoa ma talitonu e iai lava le aso e taunuu ai. Ona iai lea o suiga e pei ona ta'ua, tuu ese'eseina ai le saito mai le titania. Peita'i, o se avanoa ta'ua fo'i e toe fai ai se suiga o le olaga, ae le'i taunuu le faamasinoga. Aua o le faamoemoe lena o le faataoto, o le lu'i ma le fe'au faamalosi mo le 'au faatuatua e suia ai lona tagata ma talitonu e iai le manuia mo le tagata faatuatua i le lumana'i

A'o'oga taua mai le Faataoto mo tatou olaga o aso uma.

Ua aumaia e leni faataoto nisi o a'o'oga ta'ua mo o tatou tagata faatuatua. Ua tatou talitonu i le Atua pule aoao o lo'o galue pea i lana foafoaga. Peita'i, mai leni faataoto, ia tatou iloa foi o lo'o galue foi le fili. E le na'o le Atua o lo'o galue. O lona uiga, 'aia ne'i o tatou vavevave ma tau le pua ma lafo ma tuua'ia le Atua pe a o'o ina tutupu mai faama'i ma mea leaga. O le masani lea o le toatele, na tupu loa le galulolo, le misela ma le koviti, ua vave lava ona faapea ifo, o mala mai le Atua. O lea ua manino, o lo'o iai foi le fili, pe le'o faiga ea nei a le fili? Pau le mea ia manino, fai mai Mataio, o le Atua nate luluina le saito lelei, a'o le fili ua na'o le titania¹¹. O le faamanatu foi lea mo so'o se Kerisiano, 'aia ne'i e māmā i manatu le upumoni leni, **o lo'o galue pea le fili**. O le mea mautinoa o lo'o luluina pea e le Atua le saito lelei i o tatou loto, a'o le mea o lo'o manaomia, o le ta tali atu. Fai mai le lu'i a le faataoto, (v.43) "O le ua iai taliga, ina faalogo mai ia". O le valaau ina ia mautinoa, filifili tatau, ma ola i se ola olaga sa'o ma lelei. E pei e manaia le upu Tuvalu o le titania, o le talatala. E faigofie ona malamalama ai.

Faaso mo le Auaigaluega:

Ou te tautala lava ma le ava, auā e le'i o'o lo'u tagata

faatauvaa i le lavelave o le galuega o lo'o fitaituga ai le mamalu o le 'aupaigaluega e ala i le tausiga o 'aulotu ma ekalesia. A'o nisi nei o nai motuga-afa ma nai seuseu e mafai ona tatou aumaia mai leni faataoto.

1. Le tau ma sui (*Non-retaliation*): Tasi leni o fe'au taua o lo'o aumaia i le faataoto a le Ali'i. E ui lava ina faaleaga mai le fili, e le'i iai lava se naunautaga, ina ia tau ai i le leaga. Pe'ita'i, ua taoto lena faamasinoga i le Atua, o le Atua lava nate tau mai.

2. Ia mafaufau lelei (*Contemplation*): E ta'ua tele le nofo lelei i lalo ma mafaufau i se faaiuga lelei ma le tonu. Ia matuai su'esu'e ma iloilo lelei se mataupu i ona itu uma. Ina ia malamalama ma manino lelei i se mea ua tupu ma le tali o le a avatu i lea faamoemoe ua aumai. Faapei ona naunau mai auuina ina ia vele'esea le titania, fai mai le matai, "Aua... tuu ai pea e tupulua." Auā a leai le leaga e le iloa foi le lelei. Ia iloa foi le sesē, ina ia maua ai le sa'o.

3. Onosa'i (*Patience*): Tasi leni o faafitauli mo i tatou o Tama, vave tele le ita. E tau le lava lo tatou onosa'i. A'o le ata lena o lo'o valivali mai e Iesu, ia iloa ona onosa'i pe a tutupu faigata. Ia iloa ona tali tiga, aua e fili faatasi pea le lelei ma le leaga. E le vale foi le taunuuga o le tagata onosa'i. O lea, ia faifai malu pea ou faiva, ia toa pea le tai ma mau le toovae, pe a tutupu faafitauli i le galuega.

4. Faamoemoe (*Hope*): E ui lava i faigata, e ui foi ina taufaaleaga mai le fili ma taumafai e lepeti lou soifua taumafai mo le Atua ma lona finagalo. 'Aua nei muta ai le faamoemoe. Pei lava o le taualuga o le faataoto. E iai le faamoemoe, e iai le aso e taunuu ai le faamasinoga tonu a le Atua. Ona o'o mai ai le manuia i le tagata, pe afai tatou te lē tau ma sui, lelei mafaufau ma le faatofalaiga, ma mau pea le onosa'i pe a tutupu faigata.

O se taumafai vaivai lena mo leni pepa. Pei lava ona tu'u atu le folasaga i le amataga, o leni lava olaga o se soifuaga o luitau. E fili faatasi ai le lelei ma le leaga. E ui foi ina faamata'u mai leni faama'i pepesi. Ae tatou te lototetele pea, e lē tuulafoaina i tatou e le Atua. O lea lava ua tatou vaaia ataata o taulelei. Lea ua maua vailaau puipui ma nisi o togafitiga e tali atu ai i leni fa'ama'i oti, ua afaina ai le lalolagi. Ua manino le finagalo o le Alii e pei ona molimau Mataio. Ia tatou faamasani i le ola faatasi ma puapuaga. O le Kerisiano lava ia e tatau ona puapuaga, e tatau ona tigaina (*suffer*). E le finagalo Iesu tatou te sosola ese mai puapuaga. O lona faamoemoe ia tatou iloa ona ola faatasi ma puapuaga tatou te maua ai le filemu moni ma le faatuatua mausali.

O le faigata lena o la tatou galuega i le lalolagi, auā o lo'o iai pea le fili e fai ma faalavelave. Ua i o tatou lima le malo o le Atua. O oe ma 'au o le malo o le Atua. Tatou le ekalesia, o la tatou matafaioi tauave lea, folafola ma galueina le malo lea, ma ia mautinoa e iai le aso ma le ituaso, e o'o mai ai le faamasinoga, ma taunuu ai le **atoaga** o lona malo.

O le upu moni e le faigofie leni galuega, o aso ua malu, o aso foi ua soua. E iai foi taimi e luluti ai faigata ma malosi mai ai le fili. Fai mai le autu, "A lutia oe i Puava, 'aia nei e tau ai i le leaga, ia lelei lau faatofalaiga, ia mamao lau faautautaga, ia e onosa'i ma lototele, auā ua tatou mautinoa e iai lo ta taeao i Fagalele, tatou te maua ai le fiafia ma le manuia e ala i le alofa tunoa o le Atua.

Ia manuia tele leni tauaofiaga, soifua.

Saunia ma Tapenaina : Faletoi Aofia FS.

ITULAU MO TUPULAGA

OFISA O A'OA'OGA KERISIANO

"O SILEO E FAGUFAGU ATU MAILE TAEAOAFUA O TUPULAGA."

**MATAUPU – "FA'ATUPU FA'ALAVELAVE ONA UA
LĒ USITA'I I LE ATUA"**

TUSI FAITAU – FA'AMASINO 13: 1 – 16: 31

SINI – O se faasoa mo Autalavou ina ia mafai ona fa'atāuina talitonuga fa'a – Kerisiano i le alofa ma le filemū o le Atua. Ia manino foi tupulaga, a ola fa'atupu fa'alavelave ma fa'asauā, o lona uiga ua lē usita'i i le finagalo o le Atua.

AOTELEGA O LE MATAUPU –

O le fa'a – Naseri (numera 6:2) o se tasi lea o tu anamua e pei foi ona faia e Isaraelu, e vavae'eseina ai se tagata mo le Atua. E 'ese'ese mafuaaga mo le tautoga fa'a – naseri. E mafai ona ofoina ai sa lā tama a'o le'i fanau mai, e pei o Samasoni. E tauto ai nisi ua gasegase po ua i ai ni ona fa'afitauli. E tauto ai se fafine ua masalomia e lona to'alua ua mulilua, se'i maua le i'uga o le tulaga e pei ona masalomia ai. E tauto fa'a – naseri foi tamaita'i ma pologa pe a fa'atunuina e o latou matai. E 'ese'ese lava foi le umi e fa'a – naseri ai (6 masina aga'i i le soifuaga ato). I le vaitaimi o pule'aga a Eleni ma le sauā o Anetioka Epifane, sa tauto ai fa'a – naseri le to'atele o tagata Iutaia e tete'e atu ai i ia faiga sauā. E lē o le fa'a – naseri le ola fa'a – monike, e lē fa'asāina foi le faia o se aiga po'o se to'alua. (Not to withdraw from society to a monastic life, and celibacy is not a must)

O tapu ia po'o tulafono e tolu, ia tausia e le fa'a – naseri, e fa'aopoopo i tulafono a Mose.

E lē taumafa i se uaina po'o se isi mea e gaosi mai le uaina, e o'o i fua o le vine.

E lē o'o le tafi i lona lauulu.

E lē pa'i atu i se tino maliu, po'o se manu ua pe (Fa'amasino 14: 8 – 9)

E lē o i ai se fa'amatalaga a le Tusi Paia e uiga i le mafua'aga o le fa'asāina o ia mea, ae e i ai lava ni manatu ma mafauaaga e mafai ona feso'ota'i i ai. O le uaina, e mafai ona fa'atusaina i fiafiaga o le lalolagi nei. O le fa'atutupuina o le lauulu, o le tu'uina lea o le malosi uma i le Atua. A uma le taimi o le fa'a – naseri, ona seleina lea ma susunu i le afi o le taulaga (fellowship or peace offering.) (Numera 6: 18), ae lē o le afi o taulaga mu. O le lē pa'i i se tino maliu e fa'amafafa ai le fa'amuumua o le va feagai ma le Atua.

O le tala iā Samasoni o se tala iloga. Peita'i, a toe taga'i i ai, e foliga mai o Samasoni o se toa ma se tagata fa'aeaea i lona malō. A va'ai lelei i ai e aunoa ma se fa'aitu'au, e fai lava si mata'utia o faiga a Samasoni. E ui ina o lo'o fa'amatala le tala i se tulaga o lo'o ta'u mai ai le 'au fa'atasi o le Atua ma Samasoni, ae lē o atagia i fa'atinoga a Samasoni lea tulaga. Aemaise o le filifilia o Samasoni mai lona fanau mai e avea ma naseri a le Atua. O lona loto ita ma le fa'asauā, ua pei ai o se tagata ua tauemua ona o ana mea o lo'o fai. Sa ia sasae le gutu o le leona ona ua tagi ane iā te ia. Aiseā e fa'aali ai lona malosi i ia faiga fa'atauva'a. E lē gata i lea, ae o le tele o taimi e ita ai, na te fasiotia ai tagata Filisitia e to'atele. O se finagalo 'ea lea o le Atua na te filifilia ai tagata mo lana feau?

ae o le tele o taimi e ita ai, na te fasiotia ai tagata Filisitia e to'atele. O se finagalo 'ea lea o le Atua na te filifilia ai tagata mo lana feau?

O Samasoni sa i ai i vaitaimi o fa'amasino, o se toa na fa'aeaina le nu'u o le Atua e pei ona vala'uina ai e le Atua, ma avea ai ma ana naseri. Peita'i, o le fa'amatalaina e le tusitala o Samasoni, ua faia i se tulaga na te faitioina ai Isaraelu ma lona vala'uina e le Atua e fai ma ona nu'u filifilia. E foliga mai ua fa'amatalaina lenei tala e faitio ai iā Isaraelu. O lo'o fa'atunuina ai Isarael i le 'ese o lona filifilina e le Atua, ae ua maumau le taimi o le ola, o le malosi, ma le alofa o le Atua ia i latou. Ua fa'amaua luga ma fa'asauā ai, ma ua latou lē iloa ai ala o le Atua. Ua fai lava le loto o Isaraelu, ae lē amanaiaina le finagalo o le Atua. Ua lē gata ina lē amio mamā i luma o le Atua, a ua fa'ateteleina lo latou ola sauā. O le sauā e ma'eu lona mata'utia, auā e lē fa'a'ilogaina tagata na afāina ai. Lea na atagia i lana gaioiga mulimuli na maliliu ai fa'atasi ma Filisitia. Ua lē o gatasi lea ma le finagalo alofa o le Atua.

IA MAITAUINA MA ILOA LE 'ESE'ESEGA O MEA IA E LUA:

(a). Fa'atupu fa'alavelave po'o le sauā (aggressor, trouble maker)

(e). Puipui o lou saogalemū po'o se galuega lavea'i (victim, help a victim)

FESOASOANI E FAALAUOTELEINA AI LE MATAUPU:

Vaega 1. Fa'amasino 13: 2 – 24

O le fa'amoemoe o mātua o se aiga, aemaise o le finagalo o le Atua, ia fa'aauau le gafa, ma ia maua pea nisi e fa'aauaina o latou fa'amoemoe. E fa'apenā le tulaga o lo'o atagia mai i lea vaega o le tala. E lē faigofie i mātua le va feagai ai o le tagata ma le Atua. O le ala lea e ao ai ina mata'u i le Atua ma malamalama atili i lona finagalo mo i tatou, ina nei o tatou fai mea tatou te loto i ai ae tu'u le finagalo o le Atua, ia pe fai foi o tatou loto ae tu'ua'i o le finagalo lea o le Atua. O le ala lea o le tauanau e Manoa o lona to'alua ina ia toe aumai le agelu se'i toe fa'amalamalama le finagalo o le Atua e ala i le tama. O lo'o fia faia e Manoa se galuega lelei mo le agelu, auā e lē itiiti le manatu mai o le Atua i lo la aiga fa'atauva'a. Sa matau pea o ia e silisili 'ese le Atua i lona manatu. E tāua le lagona o le tinā, auā ua ia lagona le pa'i mai o le mafanafana o le alofa o le Atua i lona aiga. Ua fanau Samasoni ma ua tuputupu a'e, o se tama ua fa'amanuaina e le Atua. O lo'o atagia ai se ulugali'i amio lelei ma le loto maualalo. O lo'o aumai ai le tāua o fa'amoemoe o mātua mo fanau, ina ia savavali i le finagalo o le Atua. E lelei le fa'alagoalago i le Atua, mata'u i le Atua ma sa'ili ina ia faia lona finagalo, auā e fa'amanuia mai ai le Atua i lo tatou ola.

Vaega 2. Fa'amasino 14: 1 – 20

O le finaiga lea o lo'o tautala foi i ai le Aposetolo o Paulo i le Feagaiga Fou, ina ua lē tāua le peritomeina i le tino, a'o le agaga (e pei o le papatisoga a le agaga) E tele ni manatu e mafai ona fua i ai, e pei o nai manatu ia e lua ua tu'uina atu -

1. Fa'a'iloga tagata o Manoa. (auā e to'atele foi tagata o nu'u 'ese na fa'aaogaina e le Atua)

2. Popole o Manoa ne'i fulitua Samasoni i lona vala'uina mai le Atua.

O le fa'aiuga a Samasoni, "Ia aumai lea mau, aua e lelei lava ia i lou manatu" o lo'o fesiligia ai, po o lana fa'ai'uga o se fa'ai'uga a Samasoni o le fa'alē - lalolagi, po'o Samasoni le Naseri a le Atua? O le ulufia e le agaga o Samasoni, na ia saeia ai loa le gutu o le leona. E fesiligia po'o o le a le tāua na faia ai e Samasoni lea gaoioiga? O le ā se finagalo o le Atua o lo'o fa'aali mai ai. Ailoga e i ai se tāua, auā ua na o le maumau ai o le ola o si meaola. Ua faia e Samasoni ni tulaga e lē talafeagai ma tapu o le fa'a – naseri. Ua tago i le tino o le manu ua pe. E lē gata i lea, a ua soli le tulafono e lima, ua ia ave ia mea'ai le mamā mai se tulaga le talafeagai ma le soifua maloloina e fafaga ai ona mātua. O le soli lea o le tulafono e lima. O le ā le tāua o le tupua a Samasoni, ua ia to'atama'i ai i tagata na taumateina lana tupua? Atonu e tele ni manatu e tusa ma le tupua a Samasoni. Ae a va'ai lava i lona avea ma naseri ma fa'atusatusa i lona ita ma lona sauā, e leai se tāua tele o ia mea, aemaise o le uiga o le tupua o lo'o ta'ua ai le suamālie o le meli, ma le malosi o le leona. E foliga mai e fa'atāuaina lava e Samasoni fiafiaga fa'alē - tino, ma le mimita o le tagata i le fa'aaliga o lona malosi, i le ala na ia saeiina ai le gutu o le leona. O lona uiga, afai e leai se isi malosi e sili atu i le leona i le manatu o Samasoni, o lona uiga o ia la le malosi uiga 'ese lea ua i ai. A va'ai i le fa'amoemoe ma le finagalo o le Atua e pei ona amata mai ai le tala, ua lē tusa le fa'a – naseri ma le amio a Samasoni.

Vaega 3. Fa'amasino 15: 1 – 15

Ua fa'aumatia e Samasoni fa'atoaga a Filisitia ma ua ita tele ai Filisitia. Ua latou susunuina ai le aiga o le to'alua o Samasoni. Ona fasia lea e Samasoni o le faitau afe o Filisitia. A va'ai lava i le fa'amoemoe ma le finagalo o le Atua e pei ona amata mai ai le tala, ua lē tusa le fa'a – naseri ma le amio a Samasoni.

Vaega 4 Fa'amasino 16: 1 – 30

Ua leai lava se isi auala e pu'eina ai e Filisitia Samasoni. A'o le fesili, aiseā ua mafai ai pu'eina ma fa'avaivaiina o ia ina ua alu i le fafine talitane i le vanu o Soreka? E talitonu o le ā tele ni manatu o le ā fa'aalia i lea mea. Ae talitonu o le vaivaiga lava lea o Samasoni o lo'o atagia mai i le tala atoa. E lē manatu ifo po'o le ā le finagalo o le Atua ua fai ai ia ma Naseri a le Atua. E lē o tausia e Samasoni tapu o lona avea ma Naseri a le Atua. Na ona i ai o taleni ma le malosi mai le Atua, ae lē o sa'ili i le finagalo o le Atua, e tusa ai ma lona fa'aaogaina. Lea la ua atagia ai se tagata ua tele tigā ma mafatiaga ua ia fa'ao'oina i isi tagata. Ua lē ava i ona mātua ma ua lē tautala sa'o i ona mātua, ae ua silisili ai lona lē usisita'i i le finagalo o le Atua. A va'ai lava i le fa'amoemoe ma le finagalo o le Atua e pei ona amata mai ai le tala, ua lē tusa le fa'a – naseri ma le amio a Samasoni.

Fa'aiuga –

O le ata lea o le tala e tatau ona atagia mai i le galuega fa'atino. Pe a fua mai le amataga e o'o i le fa'ai'uga, i le tāua o le fa'a – naseri ma gaoioiga a tagata oi le tala. E atagia ai le

lē tāua iā Samasoni, o le fa'anaunauga sa fa'atāuaina e mātua ma le finagalo o le Atua. Peita'i, ua lē o se fa'amoemoe lelei ua ala ai ona lē fa'atāuaina e Samasoni lona avea ma naseri, a ua fa'atāuaina tele ona fiafiaga ma mitamitaga fa'ale- lalolagi. Atonu o le va'aiga lea a le Tusitala o Fa'amasino, i le fa'alogogatā o Isaraelu ma le mimita vale i mea lē aogā, ua galo ai lona filifilia e fai ma nu'u o le Atua.

A'OA'OGA E FA'AMAMAFATA ATILI

- Ia mautū i tupulaga lo latou iloa o le tāua o le avea ma Kerisiano. E lē o se mea e mimita vale ai ma fa'aalialia vale ai i le malosi o le tino, auā e o'o ai ina fa'amauuluga.
- O le avea ma Kerisiano o se avanoa e toe va'ai ai le tagata i lana amio, po'o atagia ai le finagalo o le Atua, e ala i le amio fa'a - kerisiano ma amio fa'a - Iesu Keriso.
- E lē o le fia malosi ma fai amio matagā ma mea leaga e afāina ai isi tagata, ma ta'uvalea ai fua le suafa o le Alii.

“O SI LEO FAGAUFAGU ATU MAI LE TAEAOAFUA O TUPULAGA.”

MANUIA TELE OUTOU TUPULAGA, ALOFA TELE ATU TOE FEILOAI FOI SOIFUA.

Saunia Setefano Pouli Lefale

FAAMANUIA A AOGA I TOTONU O LE LAUMUA I KANANA FOU.

I le vaiaso muamua o le masina o Iuni, na vaaia ai le fe'ilafi o teuga eseese e le gata o fanau fa'au'u, ao matua foi i le fe'ilafi o taavale teuteuina, ao laei foi o fanau. Sa faa-taunuina le faau'uga a fanau o le K-5 ma le Vasega 8 a le aoga Tulaga Muamua a Kanana Fou (KF Elementary) i luma maota o le Malumalu "Ua Taunuu". Sa vaaia le faafiaina o nai fanau ina ua maea foi le isi laasaga o le ola a'oa'oina, ae maise le taimi ua taua'a'oina ai a latou faailoga. E le gata i lea a o matua i le tali mai ma loimata, ina ua faaiuina ma le manuia taumafaiga a fanau i lenei foi tausaga. Sa faapena foi i le Aoga Mauuluga a Kanana Fou (KF High), sa faataunuina ai i le fale ta'alo a tupulaga a le tatou ekalesia. Pei ona ta'ita'iina ai e le Tama Toeina ia Sekuini Sevaetasi FT, sa faapea foi ona auai le Mamalu i le Lauaufono o le Ekalesia Aoa, ma le Sui Kovana o Amerika Samoa, ae maise sui o le DOE ma nisi o sui o le malo sa aufaatasi ai, ma le maave eseese o matua, ua molimauina faatasi le faamoemoe o fanau o lenei tausaga. O le tele o faailoga o le faauuga a le A'oga Mauuluga, sa ma'au iai le Lauaufono a le Ekalesia Aoa, o nisi o Toeina ma nisi o Faifeau, faatasi ai ma nisi o Afioga i Tiakono ua ofoina atu la latou fesoasoani mo faailoga o le fanau. Ia manuia tele le fanau ma le alo atu ma le tuuaga umi. Tausia outou e A'ao alofa o lo tatou Atua. Soifua

Lisi o le 'Aufaigaluega Agavaa mo le Galuega Tausi 'Aulotu

O le lisi leni o le 'aufaigaluega i Faifeau ma A'oa'o Kanana Fou o loo avanoa ma agavaa mo le galuega tausii 'aulotu. Ua saunia leni lisi ona o le finagalo o le Fono Tele (FT:16-26), e fesoasoani ai i 'aulotu o loo tau sailia ni o latou fa'a-feagaiga. O suafa ia, e le gata o le 'aufaigaluega o loo galulue nei mo le Ekalesia Aoao i Kanana Fou ma le Ofisa Tutotonu, a o i latou foi ia o loo galulue fa'amaoni i tua i 'aulotu ma Pulega, e pei ona tu'uina mai o latou suafa e Failautusi o Pulega ta'itasi. Afai e i ai se faigaluega agavaa e le o i ai lona suafa i leni lisi, ia fa'afesootai mai le Ofisa a le Failautusi Aoao i le imeli: gensec@efkasonline.org, e fa'alauiloa ai lou suafa i le taimi e toe lolomia ai le Lamepa.

Seminare Faafaifeau i Kanana Fou:

*Dr. Moreli Niutoa FF, *Peresitene*
 *Fepuari Logoleo FF
 *Palenapa Mataafa FF
 *Luuao Leasiolagi FF
 *Romeo Isaia Seiuli FF
 *Sasa Satoa FS
 *Gatai Patu AKF
 (* e fa'amaonia e le 'Au Toeaina)

Ofisa o A'oa'oga Kerisiano:

Setefano P. Lefale FS, Fa'atonu
 Soosoo Tuiolomutu FS
 Sega Ifopo FS
 Vili Polikapo FS

Lamepa:

Edward Semaia FS

Ofisa Failautusi

Lancaster Allen AKF

A'oga Maua'uga i Kanana Fou:

Uaea Satele FS
 Bennet Muasau AKF

Pulega Fale-Ta'u:

Ioane Ioane AKF (Fitiuta)

Pulega Itu'au

Tavita Mailoto FS
 Poasa Maui FS

Pulega Sa'ole:

Setefano P. Lefale FS (Auasi)
 Vili Polikapo FS (Amouli)
 Edward Semaia FS (Aunuu)
 Siavao Iese AKF (Alofau)

Pulega Tualatai:

Sega Ifopo FS (Vailoatai)
 Uaea Satele FS (Vailoatai)
 Daru Ulutu FS (Malaeloa)
 Sinaka Ulutu AKF (Malaeloa)

Pulega Alataua:

Rossetti Faamausili FS (Nua Seetaga)
 Tasele Tuigamala FS (Leone)
 Soosoo Tuiolomutu FS (Poloa)
 Fetuao Mua AKF (Leone)
 Bennet Muasau AKF (Amanave)

Pulega Tualauta:

Kirifi Muao FS (Pavaiai)
 Taafua Taafua FS (Iliili)
 Lancaster Allen AKF (Vaitogi)

Pulega Sua:

Ioane Peleti AKF (Fagaitua)
 Simeona Ape AKF (Laulii)

Pulega San Francisco:

Moegagogo Tamasese FS
 Ketesemane V. Tagalao FS (Sacramento)
 Eliu Eseroma FS (Daly City)
 Safue Ulufalelupe AKF (Sacramento)

Pulega Santa Clara:

Vai Malaulu FS (Tafatolu)

Pulega LA Saute:

Peniamina Sefo AKF (USC)

Pulega USO:

Ieremia Tyrell AKF (Tacoma)

Pulega Alaska i Matu:

Vaimoso Pasia FS (Lupe Faaolataga)
 Stephen Taule'ale'a FS (Alaska I)

Pulega Ausetalia:

Oto Tumanu FS (Alofisa o le Atua)

Lisi o 'Aulotu Avanoa

O nisi ia o 'aulotu o le EFKAS ua avanoa, i le taimi na lolomi ai leni Lamepa, o le a aoga ai leni lisi e saili ai so latou faifeau:

- EFKAS Masefau
- EFKAS SCC
- EFKAS San Francisco
- EFKAS Emanuel,
Fountain Valley
- EFKAS Alaska 1
- EFKAS Stockton
- EFKAS Sunnyvale
- EFKAS Kanana Fou, Sydney